

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Broj: 02-02-1012/24  
Sarajevo, 6.6.2024. godine

**Z A P I S N I K**  
**8. SJEDNICE DOMA NARODA PARLAMENTA FEDERACIJE BOSNE I  
HERCEGOVINE, održane 16.5. i 6.6.2024. godine**

Sjednica je počela sa radom u 12 sati i 34 minute.

Sjednici je predsjedavao Tomislav Martinović, predsjedavajući Doma naroda Parlamenta Federacije Bosne i Hercegovine.

Predsjedavajući je pozdravio Igora Stojanovića, potpredsjednika Federacije BiH, ministre u Vladi Federacije BiH, delegate i naglasio opravdan izostanak Nermina Nikšića, premijera Vlade Federacije BiH.

Izostanak sa sjednice najavio je Haris Zahiragić.

Prema evidenciji Stručne službe, sjednici prisustvuje 62 delegata, što čini većinu, pa Dom naroda može raditi i punopravno odlučivati.

Predsjedavajući je predložio da se prije prelaska na rad glasa o usvajanju Zapisnika 7. sjednice Doma naroda Parlamenta Federacije BiH.

Na osnovu rezultata glasanja, predsjedavajući je konstatovao da je Dom naroda, sa 62 glasa za, bez uzdržanih glasova i bez glasova protiv, usvojio Zapisnik 7. sjednice Doma naroda Parlamenta Federacije BiH.

Predsjedavajući je prije utvrđivanja dnevnog reda saopštio delegatima da, na osnovu člana 104. Poslovnika o radu Doma naroda, ako žele, mogu postavljati delegatska pitanja i pokretati inicijative.

**Fatima Gavrankapetanović-Smailbegović** je podnijela inicijativu i postavila jasno pitanje.

Inicijativu je uputila Federalnom ministarstvu zdravstva u vezi sa rješavanjem problema nedostatka lijekova za onkološke pacijente.

Pitanje je postavila Vladi Federacije BiH, premijeru Vlade Federacije BiH, federalnom ministru zdravstva i federalnom ministru finansija u vezi sa rješavanjem problema finansiranja Fonda solidarnosti.

**Emir Dautović** je postavio dva pitanja.

Prvo pitanje je postavio Federalnom ministarstvu za pitanja boraca i invalida odbrambeno-oslobodilačkog rata u vezi sa pokretanjem postupaka protiv onih koji su nanijeli štetu budžetu Federacije BiH.

Drugo pitanje je postavio direktoru RTVFBiH u vezi sa prekidom njenog signala i postojanja reakcije na izlazak RTRS iz sistema, te zatražio od Vlade Federacije BiH da se aktivno uključi u rješavanje ovog problema.

**Belma Kapo** je uputila molbu rukovodstvu Doma naroda za formiranjem odbora za zdravstvo u okviru Doma naroda, kako bi se ostvario neki pomak u ovoj oblasti.

Prvo pitanje, koje je ujedno i molba, uputila je Vladi Federacije BiH a u vezi sa ubrzavanjem procedura za konačnu operativnost odobrenih sredstava za Fond solidarnosti.

Drugo pitanje je u vezi sa izmjenama Zakona o zdravstvenom osiguranju i Zakona o zdravstvenoj zaštiti, koje su već inicirane u Domu naroda, kako bi se riješio problem pacijenata koji su primorani pomoć tražiti putem raznih udruženja.

Također, uputila je molbu federalnom ministru zdravstva i Vladi Federacije BiH u vezi sa izmjenom liste lijekova Fonda solidarnosti koja je iz 2019. godine.

**Fahrudin Čolaković** je uputio molbu delegatima u vezi sa podržavanjem izmjena i dopuna Zakona o pravima demobilisanih branilaca i članova njihovih porodica u smislu uvođenja boračkog dodatka za časne pripadnike ARBiH i HVO-a, kada taj materijal dođe na red za razmatranje.

**Aida Obuća** je postavila dva pitanja.

Prvo pitanje postavila je Vladi Federacije BiH i premijeru u vezi sa izgradnjom tunela Hranjen i strateškog povezivanja Sarajeva sa Goraždem, te da li je Vlada Federacije BiH na čelu sa premijerom Nikšićem odustala od tog kapitalnog projekta.

Drugo pitanje postavila je federalnom ministru za rad i socijalnu politiku Deliću u vezi sa donošenjem zakona o zaštiti civilnih žrtava rata, te o njegovom postavljenju na poziciju federalnog ministra.

**Azhar Sejarić** je upoznao prisutne sa problemom ekološke katastrofe na području općina Ključ, Ribnik i Mrkonjić Grad – odnosno sa iskopavanjem uglja u velikim količinama na potoku Grabovac što za rezultat ima povišene količine željeza, aluminija, bakra i olova.

Prvo pitanje je postavio ministru energije, rudarstva i industrije Petru Đokiću u vezi sa postojanjem okolišne dozvole za eksploataciju uglja na potoku Grabovac.

Drugo pitanje je uputio inspektoratu RS i Branislavu Mičiću, republičkom vodnom inspektoru, a odnosi se na poduzete radove na rješavanju ovog problema i neprovođenja laboratorijske analize potoka Grabovac.

Također, pitanje je postavio i federalnom vodnom inspektoru i međuentitetskom tijelu za očuvanje okoliša u vezi sa poduzetim mjerama za rješavanje ovog problema koji direktno veže dva entiteta i ugrožava živote i na jednoj i na drugoj strani.

**Sandra Imširović** je postavila dva pitanja.

Prvo pitanje je postavila Cestama Federacije BiH u vezi sa početkom izgradnje autoputa Tuzla-Orašje, realizacije rehabilitacije magistralnog puta M4 uz izgradnju dva kružna toka na raskrsnici Lukavac i Gračanica i faze završetka kružnog toka Bukinje na magistralnoj cesti M18 te završetka radova na izgradnji petlje Šićki Brod.

Drugo pitanje je postavila Vladi Federacije BiH i Vijeću ministara BiH u vezi sa postojanjem sistema „Amber Alert“ na teritoriji Federacije BiH, sistema koji se aktivira u slučaju nestanka maloljetne osobe i koji omogućava širenje notifikacija putem interneta, objava na televiziji, radiju, led ekranima, bankomatima i sl.

**Sanela Klarić** je uputila inicijativu i postavila pitanje.

Inicijativu je uputila prema Federalnom ministarstvu poljoprivrede, vodoprivrede i šumarstva u vezi sa izradom zakona o zaštiti zdravlja tla.

Pitanje je, također, uputila i Federalnom ministarstvu poljoprivrede, vodoprivrede i šumarstva u vezi sa nastavkom nezakonite prakse usvajanja prijedloga programa novčanih poticaja u poljoprivredi i ruralnom razvoju za 2024. godinu.

S obzirom na to da je od Federalnog ministarstva pravde stigao odgovor o nepostojanju nadležnosti za izradu zakona o inženjerskoj komori Federacije BiH, a na koji se ukazalo u Zaključku koji je Dom naroda prihvatio u oktobru prošle godine i kojim se Vlada Federacije BiH obavezala da zajedno sa Federalnim ministarstvom pravde hitno krene u izradu zakona o inženjerskoj komori Federacije BiH, Klarić je napomenula Vladu Federacije BiH da se riješi ovaj problem.

**Muamer Zukić** je predložio premijeru Vlade Federacije BiH da uz koordinaciju sa federalnim ministrom unutrašnjih poslova i federalnim ministrom pravde sačini informaciju u vezi sa aktuelnim dešavanjima koji upućuju na eventualne sukobe.

Inicijativu je uputio prema predsjedavajućem Doma naroda u vezi sa izradom urgencije i njenog upućivanja Vladi Federacije BiH i ministrima za dostavu odgovora.

Također, uputio je inicijativu Vladi Federacije BiH u vezi sa dostavljanjem informacije o planiranim zaduženjima za 2024. godinu.

**Ivo Šimunović** je postavio pitanje Federalnom tužilaštvu, Visokom sudskom i tužilačkom vijeću BiH, Agenciji za prevenciju korupcije i koordinaciju borbe protiv korupcije, nosiocima funkcija u zakonodavnoj, izvršnoj i sudskoj vlasti, te glavnom federalnom tužiocu Munibu Haliloviću u vezi sa istragom nakon revizije privatizacije Elektro Bosne d.d. Jajce i dostavom informacija o poduzetim aktivnostima Tužilaštva u Travniku.

**Amra Babić** je postavila dva pitanja.

Prvo pitanje je postavila Federalnoj upravi za inspeksijske poslove u vezi sa brojem provedenih kontrola od federalnih lovnih inspektora u periodu mart 2017. – april 2024. godine nad radom lovačkih saveza u Federaciji BiH i uputila molbu da joj se dostavi spisak svih lovačkih saveza registriranih na području Federacije BiH sa podacima o njihovim odgovornim licima.

Drugo pitanje je uputila Kolegiju Doma naroda Parlamenta Federacije BiH u vezi sa nepredlaganjem delegata Nezima Alagića za člana Parlamentarne komisije odgovorne za reviziju jer se radi o jedinom članu Kolegija Doma naroda koji istovremeno nije član Komisije.

**Vildana Bešlija** je, u ime Udruženja za fizioterapiju Federacije BiH, uputila inicijativu za uvođenje projekta fizioterapija kod onkoloških pacijenata, te uputila molbu da joj se dostavi informacija o izradi zakona o fizioterapiji za čije su donošenje više puta podnošene inicijative.

**Damir Džeba** je postavio dva pitanja.

Prvo pitanje je u vezi sa prenosom državnog vlasništva nad zgradom u ulici Hamdije Kreševljakovića 3 koju koristi Parlament Federacije BiH na Grad Sarajevo. S obzirom na to da je Zakonom o privremenoj zabrani raspolaganja državnom imovinom takva vrsta prenosa zabranjena - da li će pravobranilaštvo BiH u skladu sa svojom nadležnošću pokrenuti odgovarajuće postupke kako bi se uspostavilo zakonito stanje.

Drugo pitanje je postavio Federalnom ministarstvu energije, rudarstva i industrije, odnosno federalnom ministru Vedranu Lakiću u vezi sa dostavom informacije o ukupnom iznosu izgubljenih arbitražnih sporova.

**Goran Broćeta** zatražio je od prisutnih da se ne vrši diskriminacija entiteta RS u vezi sa trenutnim aktuelnim problemima.

**Miomirka Melank** je uputila dvije inicijative.

Prvu inicijativu je uputila rukovodstvu Doma naroda da se sjednice klubova naroda na dan održavanja sjednice ne zakazuju u istom terminu zbog nepostojanja slobodnih termina.

Drugu inicijativu je uputila Vladi Federacije BiH za uvođenje jedinstvenog poreza na imovinu na nivou Federacije BiH kao što je to slučaj u RS-u.

Predsjedavajući je potom pitao delegate ima li prijedloga za izmjenu i dopunu dnevnog reda.

Delegatkinja Aida Obuća, predsjednica Komisije za ravnopravnost spolova Doma naroda, predložila je dopunu dnevnog reda u vezi sa setom zaključaka koji se odnose na institucionalni odgovor na nasilje u porodici unutar Federacije BiH, a koji su usvojeni na tematskoj sjednici Komisije za ravnopravnost spolova i Komisije za ljudska prava Doma naroda Parlamenta Federacije BiH.

Predsjedavajući je obavijestio delegate da je Vlada Federacije BiH dostavila tri zakona s prijedlogom da se razmatraju po skraćenom postupku.

Vlada Federacije BiH dostavila je sljedeće prijedloge zakona sa prijedlogom da se razmatraju po skraćenom postupku:

- Prijedlog Zakona o izmjenama Zakona o kontroli cijena,
- Prijedlog Zakona o izmjeni i dopuni Zakona o izvršenju krivičnih sankcija u Federaciji BiH,

- Prijedlog Zakona o dopunama Zakona o radu.

Na osnovu rezultata glasanja, predsjedavajući je konstatovao da je Dom naroda, sa 59 glasova za, uz jedan uzdržani glas i bez glasova protiv, prihvatio da se Prijedlog Zakona o izmjenama Zakona o kontroli cijena razmatra po skraćenom postupku.

Na osnovu rezultata glasanja, predsjedavajući je konstatovao da je Dom naroda, sa 61 glasom za, bez uzdržanih glasova i bez glasova protiv, prihvatio da se Prijedlog Zakona o izmjeni i dopuni Zakona o izvršenju krivičnih sankcija u Federaciji BiH razmatra po skraćenom postupku.

Na osnovu rezultata glasanja, predsjedavajući je konstatovao da je Dom naroda, sa 46 glasova za, uz osam uzdržanih i uz sedam glasova protiv, prihvatio da se Prijedlog Zakona o dopunama Zakona o radu razmatra po skraćenom postupku.

Nakon toga, prešlo se na utvrđivanje dnevnog reda.

Na osnovu rezultata glasanja, predsjedavajući je konstatovao da je Dom naroda, sa 64 glasa za, uz 1 uzdržani glas i bez glasova protiv, usvojio sljedeći:

## DNEVNI RED

- 1) Prijedlog Zakona o izmjenama Zakona o kontroli cijena - skraćeni postupak,
- 2) Prijedlog Zakona o izmjeni i dopuni Zakona o izvršenju krivičnih sankcija u Federaciji BiH - skraćeni postupak,
- 3) Prijedlog Zakona o dopunama Zakona o radu - skraćeni postupak,
- 4) Prijedlog Zakona o poduzetničkoj infrastrukturi u Federaciji BiH,
- 5) Prijedlog Zakona o poticanju razvoja male privrede,
- 6) Nacrt Zakona o unutrašnjoj trgovini,
- 7) Nacrt Zakona o djelatnosti psihologa u Federaciji BiH,
- 8) Nacrt Zakona o izmjenama i dopunama Zakona o vraćanju, dodjeli i prodaji stanova,
- 9) Prijedlog Odluke o usvajanju Strategije poljoprivrede i ruralnog razvoja Federacije Bosne i Hercegovine 2021. -2027. godina,
- 10) Prijedlog Odluke o prihvatanju zaduženja po Sporazumu o zajmu između BiH i Međunarodne banke za obnovu i razvoj (IBRD) za Drugi projekt podrške zapošljavanja,
- 11) Prijedlog Odluke o prihvatanju zaduženja po Ugovoru o finansiranju između BiH i Evropske investicione banke za realizaciju projekta Gradski prijevoz u Sarajevu – B,
- 12) Informacija o aktivnostima o postupku izdavanja energetske dozvole za izgradnju VE „Škadimovac“ privrednog društva „RWP Vitorog“ d.o.o. Glamoč sa Prijedlogom Zaključka.

### 1. **Prijedlog Zakona o izmjenama Zakona o kontroli cijena** - skraćeni postupak

Tekst Zakona je utvrdila Vlada Federacije BiH.

Predstavnički dom obavijestio je Dom naroda da je na nastavku 10. sjednice, održane 22.4.2024. godine, usvojio Prijedlog Zakona o izmjenama Zakona o kontroli cijena u tekstu kako ga je predložila Vlada Federacije BiH.

Prijedlog Zakona razmatrala su nadležna radna tijela.

Prijedlog Zakona obrazložio je Jasmin Kadić, savjetnik ministra Federalnog ministarstva trgovine.

U raspravi je učestvovala Aida Obuća.

Na osnovu rezultata glasanja, predsjedavajući je konstatovao da je Dom naroda, sa 62 glasa za, uz tri uzdržana glasa i bez glasova protiv, usvojio Prijedlog Zakona o izmjenama Zakona o kontroli cijena.

## **2. Prijedlog Zakona o izmjeni i dopuni Zakona o izvršenju krivičnih sankcija u Federaciji BiH - skraćeni postupak**

Tekst Zakona je utvrdila Vlada Federacije BiH.

Predstavnički dom obavijestio je Dom naroda da je u nastavku 10. sjednice, održane 22.4.2024.godine, usvojio Prijedlog Zakona o izmjeni i dopuni Zakona o izvršenju krivičnih sankcija u Federaciji BiH u tekstu kako ga je predložila Vlada Federacije BiH.

Prijedlog Zakona razmatrala su nadležna radna tijela.

Prijedlog Zakona obrazložio je Vedran Škobić, federalni ministar pravde.

U raspravi su učestvovali Mehmed Memišević i Vedran Škobić.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 67 glasova za, bez uzdržanih glasova i bez glasova protiv, usvojio Prijedlog Zakona o izmjeni i dopuni Zakona o izvršenju krivičnih sankcija u Federaciji BiH.

## **3. Prijedlog Zakona o dopunama Zakona o radu - skraćeni postupak**

Tekst Zakona je utvrdila Vlada Federacije BiH.

Predstavnički dom obavijestio je Dom naroda da je na nastavku 10. sjednice, održane 22.4.2024.godine, usvojio Prijedlog Zakona o dopunama Zakona o radu u tekstu kako ga je utvrdila Vlada Federacije.

Prijedlog Zakona obrazložio je Adnan Delić, ministar Federalnog ministarstva rada i socijalne politike.

U raspravi su učestvovali: Emir Dautović, Jelena Pekić, Damir Džeba, Dževad Hadžić, Albin Zuhrić, Vibor Handžić, Eldin Delić, Adnan Delić i Jasna Duraković.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 57 glasova za, uz pet uzdržanih glasova i bez glasova protiv, usvojio Prijedlog Zakona o dopunama Zakona o radu.

#### **4. Prijedlog Zakona o poduzetničkoj infrastrukturi u Federaciji BiH**

Tekst Zakona je utvrdila Vlada Federacije BiH.

Predstavnički dom je usvojio Prijedlog Zakona o poduzetničkoj infrastrukturi u Federaciji BiH na 10. sjednici sa sedam amandmana Vlade Federacije koji su postali sastavni dio Prijedloga Zakona.

Također, Vlada Federacije BiH je prihvatila dva amandmana na sjednici Predstavničkog doma koji su postali sastavni dio Prijedloga Zakona.

Na Prijedlog Zakona o poduzetničkoj infrastrukturi u Federaciji BiH amandman je podnio delegat Ivan Ivić.

Amandman je dostavljen Vladi Federacije BiH.

Vlada Federacije BiH dostavila je mišljenje da ne prihvata predloženi amandman.

Prijedlog Zakona obrazložio je Vojin Mijatović, ministar Federalnog ministarstva razvoja, poduzetništva i obrta.

U raspravi su učestvovali Ivan Ivić, Oliver Soldo i Vojin Mijatović.

Predsjedavajući je dao na glasanje amandman delegata Ivana Ivića na Prijedlog Zakona o poduzetničkoj infrastrukturi.

Na osnovu rezultata glasanja, predsjedavajući je konstatovao da predloženi amandman nije dobio potrebnu većinu (24 glasa za, 28 uzdržanih i 8 glasova protiv).

Potom se prešlo na glasanje o Prijedlogu Zakona o poduzetničkoj infrastrukturi u Federaciji BiH.

Predsjedavajući je konstatovao da je Dom naroda Parlamenta Federacije BiH, sa 52 glasa za, uz osam uzdržanih glasova i bez glasova protiv, usvojio Prijedlog Zakona o poduzetničkoj infrastrukturi u Federaciji BiH.

#### **5. Prijedlog Zakona o poticanju razvoja male privrede**

Tekst Zakona je utvrdila Vlada Federacije BiH.

Predstavnički dom je usvojio Prijedlog Zakona o poticanju razvoja male privrede na 10. sjednici sa tri amandmana koje je Vlada Federacije prihvatila, a koji su postali sastavni dio Prijedloga Zakona.

Prijedlog Zakona obrazložio je Vojin Mijatović, ministar u Federalnom ministarstvu razvoja, poduzetništva i obrta.

U raspravi niko nije učestvovao.

Na osnovu rezultata glasanja, predsjedavajući je konstatovao da je Dom naroda, sa 50 glasova za, uz dva uzdržana glasa i bez glasova protiv, usvojio Prijedlog Zakona o poticanju razvoja male privrede.

## **6. Nacrt Zakona o unutrašnjoj trgovini**

Tekst Nacrta Zakona je utvrdila Vlada Federacije BiH.

Predstavnički dom je razmatrao Nacrt Zakona o unutrašnjoj trgovini i Zaključkom ga prihvatio.

Nacrt Zakona obrazložio je Jasmin Kadić, savjetnik ministra Federalnog ministarstva trgovine Amira Hasičevića.

U raspravi su učestvovali: Almir Babajić, Miomirka Melank, Dževad Hadžić, Muamer Zukić, Damir Džeba i Damir Marjanović.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 62 glasa za, uz jedan uzdržani glas i bez glasova protiv, prihvatio sljedeći:

### **ZAKLJUČAK**

1. Dom naroda Parlamenta Federacije BiH prihvata Nacrt Zakona o unutrašnjoj trgovini i smatra da može poslužiti kao osnov za izradu prijedloga Zakona.
2. Zadužuje se predlagač da organizuje i provede javnu raspravu u trajanju 60 dana.
3. Zadužuje se predlagač da prilikom izrade prijedloga Zakona ima u vidu primjedbe, prijedloge i sugestije iznesene u raspravi na ovoj sjednici Doma naroda kao i one koje su dostavljene ili će biti dostavljene u pisanoj formi.

## **7. Nacrt Zakona o djelatnosti psihologa u Federaciji BiH**

Tekst Nacrta Zakona je utvrdila Vlada Federacije BiH.

Predstavnički dom je razmatrao Nacrt Zakona o djelatnosti psihologa u Federaciji BiH na nastavku 10. sjednice i Zaključkom ga prihvatio.

Delegatkinja Sandra Imširović je dostavila prijedlog Zaključka na Nacrt Zakona o djelatnosti psihologa u Federaciji BiH.

Nacrt Zakona obrazložio je Adnan Delić, ministar u Federalnom ministarstvu rada i socijalne politike.

Predsjedavajući je prije otvaranja rasprave saopštio delegatima da ima dileme u vezi sa nadležnostima Ministarstva rada i socijalne politike za predlaganje ovog zakona.



U raspravi su učestvovali: Damir Džeba, Dževad Hadžić, Emir Dautović, Tomislav Martinović, Almir Babajić, Sandra Imširović, Muamer Zukić, Ilija Nakić, Vibor Handžić, Damir Marjanović, Vildana Bešlija, Belma Kapo, Sanela Klarić, Amir Orlović, Vedrana Vujović, Ivan Odak, Jelena Pekić, Silva Banović, Miomirka Melank, Vesna Saradžić i Nezim Alagić.

Predsjedavajući je dao pauzu 15 minuta.

Predsjedavajući je obavijestio delegate da je Vlada Federacije dostavila prijedlog da se odloži pretres o Nacrtu ovog zakona, što su delegati prihvatili.

Sjednica je prekinula sa radom u 18 sati i 42 minute.

\*\*\*

### **Nastavak sjednice od 6.6.2024. godine**

\*\*\*

Sjednica je počela sa radom u 12:21 sati.

Sjednici je predsjedavao Tomislav Martinović, predsjedavajući Doma naroda Parlamenta Federacije BiH.

Predsjedavajući je pozdravio delegate i delegatkinje, a posebno potpredsjednike Federacije Refika Lendu i Igora Stojanovića, te ministre u Vladi Federacije BiH.

Izostanak sa sjednice najavili su delegati: Miroslav Mitrović, Vedrana Vujović, Dževad Hadžić, Duško Radun, Hikmet Hodžić, Tanja Šantić, Muamer Zukić, Dragana Damjanović, Damir Marjanović i Mehmed Memišević.

Prema evidenciji Stručne službe, sjednici prisustvuju 42 delegata, što čini većinu, pa Dom Parlamenta Federacije BiH može raditi i punovažno odlučivati.

Predsjedavajući je podsjetio delegate na preostale tačke dnevnog reda:

- 8) Nacrt Zakona o izmjenama i dopunama Zakona o vraćanju, dodjeli i prodaji stanova,
- 9) Prijedlog Odluke o usvajanju Strategije poljoprivrede i ruralnog razvoja Federacije BiH 2021. - 2027. godina,
- 10) Prijedlog Odluke o prihvatanju zaduženja po Sporazumu o zajmu između BiH i Međunarodne banke za obnovu i razvoj (IBRD) za Drugi projekt podrške zapošljavanja,
- 11) Prijedlog Odluke o prihvatanju zaduženja po Ugovoru o finansiranju između BiH i Evropske investicione banke za realizaciju projekta Gradski prijevoz u Sarajevu – B,
- 12) Informacija o aktivnostima o postupku izdavanja energetske dozvole za izgradnju VE „Škadimovac“ privrednom društvu „RWP Vitorog“ d.o.o. Glamoč sa Prijedlogom Zaključka.

## **8) Nacrt Zakona o izmjenama i dopunama Zakona o vraćanju, dodjeli i prodaji stanova**

Tekst Nacrta Zakona utvrdila je Vlada Federacije BiH.

Predstavnički dom obavijestio je Dom naroda da je na 10. sjednici, održanoj 22.4.2024. godine, razmatrao Nacrt Zakona o izmjenama i dopunama Zakona o vraćanju, dodjeli i prodaji stanova i Zaključkom ga prihvatio.

Nacrt Zakona je upućen u javnu raspravu.

Nacrt Zakona razmatrala su i nadležna radna tijela Doma.

Nacrt Zakona obrazložio je Hamid Suljović, pomoćnik federalnog ministra prostornog uređenja.

U raspravi je učestvovao Amir Orlović.

Na osnovu rezultata glasanja, predsjedavajući je konstatovao da Dom naroda, sa 37 glasova za, uz 13 uzdržanih glasova i uz jedan glas protiv, nije prihvatio sljedeći:

### **ZAKLJUČAK**

1. Dom naroda Parlamenta Federacije BiH prihvata Nacrt Zakona o izmjenama i dopunama Zakona o vraćanju, dodjeli i prodaji stanova i smatra da može poslužiti kao osnov za izradu prijedloga Zakona.
2. Zadužuje se predlagač da organizira i provede javnu raspravu u trajanju 60 dana.
3. Zadužuje se predlagač da prilikom izrade prijedloga Zakona ima u vidu primjedbe, prijedloge i sugestije iznesene u raspravi na sjednici Doma naroda kao i one koje su dostavljene ili će biti dostavljene u pisanoj formi.

## **9) Prijedlog Odluke o usvajanju Strategije poljoprivrede i ruralnog razvoja Federacije BiH 2021. - 2027. godina**

Prijedlog Odluke dostavila je Vlada Federacije BiH.

Predstavnički dom je obavijestio Dom naroda da je na 10. sjednici, održanoj 22.4.2024. godine, donio Odluku o usvajanju Strategije poljoprivrede i ruralnog razvoja Federacije BiH.

Prijedlog Odluke o usvajanju Strategije razmatrala su nadležna radna tijela.

Prijedlog Odluke obrazložio je ministar Kemal Hrnjić.

Predsjedavajući je pozdravio Lidiju Bradaru, predsjednicu Federacije BiH, koja se u međuvremenu pridružila radu sjednice.

U raspravi je učestvovala Sanela Klarić.

Na osnovu rezultata glasanja, predsjedavajući je konstatovao da je Dom naroda, sa 37 glasova za, uz 18 uzdržanih glasova i bez glasova protiv, nije prihvatio prijedlog ove odluke.

Delegat Damir Džeba, predsjednik Kluba delegata hrvatskog naroda, zatražio je pojedinačno izjašnjanje za ovu tačku dnevnog reda.

Sekretar Doma naroda Izmir Hadživadić je, u skladu sa odredbom 113. Poslovnika o radu Doma naroda, izvršio pojedinačno izjašnjanje delegata.

Na osnovu rezultata pojedinačnog izjašnjanja, predsjedavajući je konstatovao da Dom naroda, sa 40 glasova za, uz 16 uzdržanih glasova i uz jedan glas protiv, nije prihvatio prijedlog ove odluke.

Damir Džeba zatražio je pauzu 10 minuta.

Nakon pauze, potpredsjedavajući Doma naroda Nezim Alagić zatražio je dodatnu pauzu od pola sata.

Nakon pauze, predsjedavajući je pročitao Zaključak Vlade Federacije BiH, koji je u međuvremenu stigao, da se sa sjednice Doma naroda povlače sljedeće tačke:

10. Prijedlog Odluke o prihvatanju zaduženja po Sporazumu o zajmu između BiH i Međunarodne banke za obnovu i razvoj za Drugi projekt podrške zapošljavanja,
11. Prijedlog Odluke o prihvatanju zaduženja po Ugovoru o finansiranju između BiH i Evropske investicijske banke za razvijanje projekta Gradski prijevoz u Sarajevu - B i
12. Informacija o aktivnostima o postupku izdavanja energetske dozvole za izgradnju VE „Škadimovac“ privrednog društva „RWP Vitorog“ d.o.o. Glamoč sa Prijedlogom Zaključka.

Predsjedavajući je obavijestio delegate da, s obzirom da je Vlada Federacije BiH, u skladu sa članom 176. Poslovnika o radu Doma naroda Parlamenta Federacije BiH predložila odlaganje pretresa i izjašnjanje o Nacrtu zakona o djelatnosti psihologa u Federaciji Bosne i Hercegovine, ovaj zakon će se razmatrati na nekoj od sljedećih sjednica.

Sjednica je završena u 14 sati i 26 minuta.

\*\*\*

Transkript sjednice čini sastavni dio Zapisnika.

\*\*\*

SEKRETAR  
Izmir Hadživadić

PREDSJEDAVAJUĆI  
Tomislav Martinović